

721  
GEORGII ERNESTI STAHL,

M. D. & PROF. PVBL. ORDIN.

h. t. FACULT. DECANI

PROPempticon

INAUGURALE

DE

ORTU VENARUM

METALLIFERARUM





On exiguum profectò, admiranda Sapientiæ divinæ, in opere creationis nostri globi terraquei, specimen, elucescit ex intimiore seu *subterranea* ipsius constructione, quæ visceribus suis non modò valde diversas *species rerum*, & maximum earum *numerum* continet: sed etiam specialissimis quibusdam *directionibus* peculiarem planè curam *destinata* cujusdam *coordinationis* atque *dispositionis*, infert & demonstrat. Sunt certè hujus exemplar præcipuum ipsa *Vena Metallica*, quarum quidem *certus positus*, secundum varias quibus absolvuntur, sui partes, admodum conspicuus, materiam curiosæ considerationi planè commodam exhibet, & simul, nostro quidem judicio, viam sternere videtur probabili prorsus decisioni illius *questionis: an vena metallica fortuitam aliquam originem, quondam tempus, habeant?* an verò jam inde à principio creati hujus globi eidem *inserta* videantur? In vulgatis quidem rerum Physicarum Historiis atque Systematibus, quæ quidem mihi evolvere obtigit, vix mentionem, nedum rationem harum rerum hætenus reperire licuit: Sicut etiam ferè circumspicientes è recentibus, non nisi *generales* physicas scribere suscipiant, antiquiores verò vix levissimam harum rerum notitiam allegant: ita ut hodiernum illud conamen, Physicam per *experimenta* illustrandi, propriè & unicè, isti fundamento innitatur, quod *antiqui* experientia adeoque *vera* harum verum *historia* destituti fuerint. Unde quidem præcipuus ille, si non universus physicæ defectus, in his utique fundatur, nempe *historiæ* sufficientis defectu, & mixtionis ignoratione.

Est vero *sententia de genesi* illa Metallorum ferè *duplex*, dum alii statuunt à *prima creatione* illa simul præducta atque visceribus terræ immersa esse: alii verò existimant, ipsa demum per tempus subnasci, *confluere, resolvi*, imò *nasci & renasci*, prout vagi varii halitus inter se concurrant. Quemadmodum vero fieri posset, ut hæc inter se dissidere visæ opiniones, sub rectè facta applicatione, diversis nempe respectibus, utraq; sine mutuo præjudicio, *vera* esse possent; ita, ut omnis æquivocatio, & consequenter questionum *confusio*, evitetur, præstare arbitramur, ut ita formetur status interrogationis, ut illi deinde, jam indubio, decisio quoque firma applicari possit. *Duplex* nimirum est *questio*. *Primò*, an metalla aut mineralia *nunquam, nisi in certis planè tractibus*, quos vulgo *venas* appellamus, generari possint? aut: *an utiquè* possint? & an deinde illa generatio, quæ citra talem in tractus certos distributam repartitionem



nem facta est, ita *ab ipsa creatione*, an verò *succedentibus* demum, imò fortè *proximis temporibus*, facta sit: *Secundò*, an ejusmodi metalla, quæ in *venas certas distributa* inveniuntur, sive à *prima creatione* ita disposita fuerint: sive demum alio aliquo modo, & *posterioribus temporibus*, terræ ita inserta, & ibidem formata. Breviter: non simpliciter, metalla, aut minera, sed *vena metallica*, aut *minerales*, an ita mundi, seu globi nostri terraquei compagi, mox in ipsa ejus *productione* insertæ, an verò post hac aliunde *abortæ*.

Quæstionis sic determinatæ suscipimus *assertionem pro priori*, nempe quod mox *ab ipsa creatione* intextæ sint. Quod ipsum tamen ut iterum tantò melius & planius obtineamus, removemus denuò aliquas, quæ officere hic possent, differentias, nempe *primò*, venarum talium tractuum *fragmenta*, irregulari positu alicubi occurrentia, quæ vulgo *Glöcke* appellant, sententia communiter recepta non improbabili, quod à *venis*, *diluvio*, aut *terra motibus* abrupta & excussa ejusmodi fragmina, in loca illa, irregulari tali positu projecta fuerint. *Secundò* excludimus hic, *ligna illa fossilia*, siquidem ita, uti describunt historici, reperiuntur, in *Angliæ Comitatu Sommersetensi*, juxta, *Transact. Philos. A. 1666. Mens. Octobr. Observ. VI.* & si quæ sunt aliæ similes. Sicut etiam *Tertiò*, tractus tales, limo magis, minera metallica foeto imbutos, *venis veris* conterminos, communiter exiguae capacitatis, ut vel ipso aspectu teste, pro *rimis* seu *fissuris* & *hiatibus* talibus haberi mereantur, pro quibus recepta metallicolarum interpretatio eosdem agnoscit, appellans proinde *Kluffte*, metallo sæpè satis ingenue refertos, *Schurzer Klufftgen*. Imò verò licet exempla non æquè suppetant, ab ipsâ tamen ratione interim nihil abaudit, quin etiam capaciores hujus generis *hiatus* dari possint, quibus illapsus *pinguis limus*, evagantes *balitus metallico-minerales* irretire, adeoque venam etiam irregularem simulare possit. Quale quid equidem suspicari olim sumus, de minera illa cupri, quæ in Comitatu *Stolbergensi*, haud procul *Bennungâ*, reperiunda, *Wickeroda*, pago ejusdem ditionis & viciniae, fundi solet, insita limo cuidam indurato, cum infinitis *lapillis semisiliceis, rotundis, glabris*, quales in fluviis aut *torrentibus* præstò sunt, interspersis, neque, quantum nobis quidem liqueat, justo corticis seu firmamenti saxei involucro vestita.

His itaque sepositis, describendam sumimus historiam Mineralium harum *venarum*, quatenus ad nostram hypothesein præcipuè facere videtur. Sunt nimirum *vena* hæ, *primò*, planè peculiari, & illo quidem solenni ordine *saxi*, hinc *limosi* cujusdam involucris, & denique intimioris veluti *medullaræ* substantiæ, distinctæ. Ita, ut ferè *saxea* robustissima, crassa, firma portio, *extremam* ejus partem con-



stituant, non quidem *circumcircâ*, sed magis *duobus* saltem *lateribus*, velut è *quadrata*, vel circiter, tractus totius structura, sibi invicem *oppositis*. Ubi quidem situs hic *saxeï* hujus ambitus, modo magis directe *perpendiculo* veluti subtrensus est, ita, ut portio ejus altera, *suprà caput* ingredientis hominis, altera *sub pedibus* ejus, constituta sit: aliàs vero deflectit etiam ab hoc situ, magis magisque ad *laterem*, ita, ut tam portio ejus *superior*, quam inde *rectum*, des *ganges* *Sachstap-*pellant, quam *fundus* & quasi pavementum, quod hinc die *Sohle*/nominant, *inclinato* positu, sed tamen exacte inter se mutuo respondente, structum videamus. Unde etiam respectus ille, quorsum *situs* hic *inclinatus*, *extrorsum* respicere apparet, das *Ausgehen* des *Gesteines* in *hangdenes* und *liegenden*/inde peti solet. Sub *saxeo* hoc involucro, & *venæ firmamento* (quod proinde etiam bono sensu die *Berg-West*e appellant) hæret deinde *limosa* mollior quædam substantia, modo *grysei* & quasi *subcoerulei*, modo *flavescentis*, cum *gryseo* variantis, coloris; quod alibi *âstig*/ *âstrich*; potius *Westich*/ *Westech*/ quasi *Westeck*/ alibi, aut alio sensu, *simbria* *venæ* des *ganges* *Salband*/i.e. *Selb. End*/vocitatur. Quæ quidem substantia interdum tenuissimæ *crassitie*, interdum satis notabilis, existit. Quamvis autem è duobus reliquis, similiter mutuo *oppositis*, lateribus, simili lorica non pariter cingatur *vena*, consideratione tamen ibi tanto magis digna est ejusdem *præscissio* & veluti divortium à contigua reliqui montis substantia, siue petrosa, siue *limosa* & terrea illa existat: quod quidem adeò exquisitè frequentissimè servat, ut etiam *angulis oppositis* illi antedictæ *saxeæ* lorice, satis appositè respondeat: *angulis* dico *oppositis* mutuis, commodè inter se convenientibus. Et hunc quidem situm, servat & continuat hæc *venæ* constructio, per *continuum*, communissimè *sui progressum*, intercidente rarò satis, aliqua ejus *conversione*, quæ vulgò *Absehen* des *Gesteins*. Et continuat deinde hæc ipsa quoque *uariatio*, iterum per longos tractus, ita ut hinc *nihil fortuitum* aut *vagum*, agnosci queat. Deinde, *secundò* exierit se specialissima talis *directio* situs *venarum*, nostrarum, in toto earundem progressu, ad *cardines mundi* relato; ut progressus illarum modo *ab oriente versus occidentem*, modo *à meridie versus septentrionem* vergens, modo aliquem situm his vicinum sortitus, eundem continua & constanti illa *directione*, *perpetuum* & immutabilem servet. Vocant hoc die *Stundte* des *Ganges*/ eamque metiuntur ad *cynosuram*, nach dem *Compaß*: satis de cetero experti, *veram venam* servare hunc tractum, in quantamlibet profunditatem, der *Gang* halte seine *Stunden* in ewige *Teuffe*. Et hoc quidem notatu tantò dignius habendum est, quod hunc *ductum* *venæ* talis *positus* & progressus prosequatur & ser-



fervet, etiam si *situm* suum secundum perpendicularum aut *angulos* fortè mutet. Nempè *tertium* in hoc genere observandum est, directus ille progressus venæ secundum *lineam*, inter *perpendicularum* & *horizontem*, seu ad *gradus elevationis*, variantem, quod *steigen* oder *fallen* des *Gangs*/vocatur. Servat etiam hoc ipsum directionem suam perpetuam juxta *angulum* quem semel formavit; Non tamen hoc æquali cum reliquis hætenus dictis conditionibus *constantia*, Sed decedit ab hac multò facilius, modo magis *inclinato* juxta *horizontem* modò præcipitato magis juxta *perpendicularum* positu, daß der *Gang* sich *stärket* oder *seiger* gerichtet in die *Teuffe* enlet oder *fället*. *Interceptio* vero ejus, per *intercessionem* fragmenti montis, insigni quadam commotione profundioris terræ forè sublapsi, turbat quidem ejus *continuitatem*, Wenn ein *Kellberg* / oder *Kamm* vorgeschossen ist / welches dem *Gang* / oder vor welchem sich der *Gang* abschneidet: quod interdum etiam per simplicem *dehiscentiam* montis, & hinc subnatas *rimas*, *hiatus*, *fossas*, obtingit, aut per *flumina* spatio illi intercedentia: Sed quando saltem tunc quicquid ita intercedit vel *perfossum* vel quomodo-cunque superatum est, deprehenditur iterum *ductus* ille hujusce *directionis* venæ proportionatus, tum ratione *positus* sui *cardinalis*, in seiner *Stunde* / tum *horizontalis* ad perpendicularum, in seinem *Fallen* / dum modò superato intermedio, oppositus ejus terminus, das *gegenüber* / rectè reperiatur.

Ex omnibus his circumstantiis, satis utique diluiscere putamus, quod hæ *Vena*, tam *firmiter* & *constantiter* *saxo* involucro, & *longissimis tractibus* in situm *perennem*, *jugiter* porrectæ atque distributæ, non *fortuito* aliquo *tempore*, *ortu*, aut *motu* ita dispositæ fuerint; sed longè verosimilius, ipsi tractui terrarum ab *antiquissimis*, imò *primævi* temporibus intextæ. Quis enim sibi concipiat, quod hujusmodi *ordinata*, *operosa*, *copiosa*, & sæpè *abundantissima* materia, quæ vix aliquot *centenis* annis, ex parte propemodum minima *exscindi* valeat, in hunc tractum terræ, temerè, & quasi levibus demum successibus ita congesta atque collecta sit? cum non modo, à *priori*, nulla quæ hoc fradeat, vetisimilis ratio appareat; sed etiam à *posteriori*, nullæ prorsus *mutationes* in hisce venis ita insignes & consideratu dignæ eveniant, quæ ad minimum aliquatenus facili mutatione adumbrarent, quod venæ hæ aliunde veluti magis fortuitò ita confluxerint; cum alias rationi nullo modò absonum, sed consentaneum potius appareat, quod, quicquid ita è *mutabilibus*, ac veluti *fortuitis*, causis, coaluit, illud etiam novas aliquas mutationes, imò iterum destructiones, è talium similibus, sanè haud ita difficulter eventuris, metuere aut expectare debeat. Jam verò nihil quidem tale temerè



evenire, videtur utique abundè testari, multiplex & constans Ex-  
perientia. Quamvis enim in ipsis *venis* metallicis, & quidem inti-  
mâ illarum substantiâ, sæpè talis *varietas* contenti *mineralis* occurrat,  
ut jam propiùs circâ superficiem terræ, *volatilior* & *ignobilior* ma-  
teria deprehendatur, quàm, altiùs continuata investigatione, in *no-  
bilius metallum* veluti mutatam esse appareat: vel contrâ, in superiori-  
bus, bono *metallo* fertilior deprehensâ, in profundo *degenerare*, & in-  
ertius quid continere, incipiat: Unde metallicolarum loquendi  
formula, *Ste kommen zu früh oder zeitlich* putantes nondum satis *ma-  
curuisse* mineram, cum *tempore*, juxta illorum opinionem, in *nobilius*  
metallum transmutandam. Non tamen applausum ullum mereri  
videtur hac traditio; cum satis certum sit, illius generis *materiam mi-  
neralem*, qualis in ejusmodi casibus, vel magis circâ *superficiem* terræ,  
vel magis in *profundo*, *luxuriare* reperitur, eandem etiam in illis lo-  
cis, ubi adhuc *metalli* locuples proventus in *eadem vena* concurrerat,  
nihilominus huic eidem sociatam repertam esse: ita ut nihil hinc  
constans subsumi aut concludi valeat, quasi necessariò in omnibus  
mineræ locis atque partibus, *equalem* planè mineræ cum metallo  
*temperiem*, *equale pondus* veluti, & eadem mutuam *proportionem* re-  
periri oporteret. Alia res est in *venarum*, interdum, sed satis sanè  
raro, occurrente ejusmodi veluti *consumptione*, ut inde suspicio satis  
verisimilis subnascatur, minerale eidem prius intextum, *absumentum*  
rursus esse, & in auras veluti exhalando evanuisse. Ubi dicti me-  
tallifossiles dicunt, *Ste seyn zu spät gekommen*. Tale quid enim e-  
venire posse uti non dubitamus, præcipuè vero in venâ, valde *con-  
sumtibili* minera quondam foetâ: ita tamen eadem facilitate, & veluti  
fortunâ, qua ita diffluit, eodem confluisse hanc materiam, illud  
statim refellit, quod licet hac ratione *minera* ipsius, in se quoque *cor-  
ruptibilioris*, absumptio fiat, eo ipso tamen minime simul *vena*, de quâ  
nobis est sermo, resolvatur aut alteratur: cum tamen satis certum  
sit ipsam substantiam *saxeam*, longè promptiùs *alterationibus*, *resolu-  
tionibus*, *destructionibus*, parere debere, quam *metallicam* mineram,  
præcipuè *nobiliorem*: Cujus quidem, substantiæ, *metallica* ullam, ne-  
dum *facilem* talem destructionem, evenire posse, ut ubi fuerit, reve-  
rà esse penitus desinat, & vel tota *auferatur localiter*, daß es *auswitten*  
*re/ausziehe*: vel in *terram nudam* & *simplicem* reducatur, loquendi  
quidem formulæ satis familiares præstò sunt, sed nihil prorsus sane  
rationis, quod nobis spondeat illis adstipulari. Generationem illam  
*metallicarum* harum *venarum*, à, *radiis siderum*, terram ita pervadenti-  
bus, & *ἀπό μυχῶν*, quasi solo schemate emphatico, in *corpus* trans-  
mutato, metalla corporea gignentibus, piget verbo tangere, cum  
unde-



undique omnes probabilitatis tramites ita deficiant, ut nusquam sit, ubi ratio pedem figere possit.

Occasionem hæc in medium proponendi suggessit nobis Dissertatio Inauguralis de METALLURGIE PYROTECHNICÆ ET DOCIMASIE METALLICÆ FUNDAMENTIS, quâ solidam suam eruditionem publicè probat.

DN. JOHANNES CHRISTIANUS FRITSCHIUS,  
Schwartzburgicus, Medicinæ Candidatus dignissimus. Natus est Rudolstadii, Illust. Com. Schwartzburg. sede, anno MDCLXXVI. die 27. Junii. Pater Vir Magnificus, AHASVERUS FRITSCHIUS, Hæreditarius in Mellingen, Jctus Celeberrimus, Comes Palatinus Cæsareus, Illust. Com. Schwartzburgico-Rudolphopolitanorum Cancellarius, Consistorii Præses, Scholæ provincialis & Alumnorum Ephorus. Mater DOROTHEA MARIA, filia Illustris ac Generosi LAURENTII ab HENNING, Sacræ Cæsareæ Majestatis, & Eminentissimi Electoris Moguntini quondam respectivè Consilarii Intimi, & Supremi Præfecti Comitum de Hatzfeld, Hæreditarii in Wandersleben, nunc beati. A primis annis in Pietate Christianâ, bonisque moribus educatus, tam in Scholâ provinciali Patriæ, quam sub privatorum Præceptorum manu ductione, in literis fideliter informatus est. Anno M DC VC. habitâ Disputatione Valedictoria, de Amicitia, sub Præs. Ampliss. Dn. M. Schwimmeri, Rectoris meritissimè ad continuanda cœpta studia, ad Academiam Jenensem se contulit. Ubi Philosophiæ varias partes hausit ex institutione Excell. Dn. Treumeri, jam S.S. Th.D. & P.P. & Excell. Dn. Posneri, Demonstrationibus de Generatione quoque interfuit. Hinc ad propositum sibi præfixum applicare cœpit animum, & privatissimæ informationi se dedit, Exc. D.D. Fickii, t. t. Practici solertissimi, nunc vero Sereniss. Duc. Sax. Vinarientis Archiatri, spectatissimi. Cujus Manu ductionem in Mathematicis, & Physiologico-Pathologico-Anatomicis, fidelissimam habuit. Et cum sub ejus directione locupletissimum Pharmacopolium Aulicum è primis fundamentis strueretur, omnibus operationibus Chymico-Pharmaceuticis interfuit, & semper prius explicationem processuum & materialium, à D.D. Fickio audivit: Ex quibus omnibus singulare fundamentum & incrementum studiis suis accessisse, gratus agnoscit. His veluti privatæ suæ industriæ initiis, superstruere cœpit ampliora Artis ornamenta, quorum diffusum & locupletem apparatus invenit in lectionibus publicis Magnif. D. Wedelii, quibus sedulo interfuit. Nec minori semper alacritate visitavit Excell. D. D. Schlevogti, P.P. celeb. demonstrationes publicas Anatomicas, in utriusque sexus cada-



cadaveribus variis quoque tum in urbe, tum extrà urbem, judicibus Scrutiniis & Sectionibus ab ipso administratis adfuit, pariter & Botanicam in horto medico, & montibus vicinis, docentem, sedulò comitatus, audivit eundem publicè explicantem Microcosmum & Microtechnen Hornianam, ut & Observationes Chirurgicas Nuckii. Anno M DC MC. cum inter universùm Studioforum cohortem inauspicatæ turbæ orerentur, domum revocatus, ibi honoratissimo suo Affini Excell. Dn. D. Cellario, Illustriss. Comit. Schvartzburg. Archiatro, in haud exigua ejus Praxi ad manus fuit mox autem eodem anno, circa vernum tempus Illustrē hanc FRIDERICIANAM accessit, & Exc. D. D. Hoffmanni; commentationes in Materiam Medicam audivit, Collegio quoque Curioso Experimentalī, ut & Therapeutico - Practico, & Chirurgico, interfuit.

Mea similiter Collegia omni cum industria & assiduitate sectatus, interfuit Practico Clinico, Anatomico, duobus Chymicis, in quibus non solum philosophica Chymia sed etiam Metallurgia & Docimasia, fundamenta & experimenta tradita percepit. Anatomiam in corpore masculo publicam aspexit, & Botanicas quoq; excursionē indefessus comitatus: Pathologiam publice traditam itidem audivit, & sub meo Præsidio Disputationem ventilavit de LUMBRICIS TERRESTRIBUS eorumq; usu Medico. Præteriti anni æstate, à Metallurgici studii amœnitate atque dignitate invitatus, ut mineralium loca natalia propriis oculis perlustraret, eorumq; tractationem prolixiorē Pyrotechnicam perspiceret, itinere suscepto potiores Misnia, Bohæmia, Sylvæ Hercyniæ, & Thuringiæ fodinas ingressus, imprimis etiam in Patria, jam florentes, & per Dei gratiam feracissimas, Schvartzburgicas, perlustravit: Obvias quoque Thermas & Acidulas, præsertim in Bohæmia, simul consideravit, Ante paucos menses ad nos reversus, jubentibus quibus obsequium debet, Licentiam jura atque Privilegia in arte Medica legitimè capeffendi, à Facultate modestè petiit. Admissus ad consueta Examina, profectus in Arte pulcherrimos exhibuit, unde ipsi Facultas data est, etiam ultimum in hoc genere publicum Eruditionis specimen edendi, quod præstabit Dissertatione Inaugurali de Metallurgiæ Pyrotechnicæ, & Docimasiæ metallicæ Fundamentis. Habebitur illa d. XXVII. Martii, horis locoque consuetis. Ad hunc Actum solennem, omnes Musarum Patronos, In specie vero Serenissimum Holsatiæ Ducem FRIDERICUM WILHELMUM, Illustrissimos, Generosissimosque Comites, Barones, cæterosque Fautores atque Cives Academiæ, Nobilissimos, Doctissimosque, officiosissime atque humanissime invitamus. P. P. Halis Magdeburgicis, d. XXV. Martii, M DCC.